


Kat. Komp.



9128

Augustianie







# TRIA DIFFICILIA

EX SUMMA

DIVI THOMÆ DOCTORIS ANGELICI,

*Ad normam Proverbialis difficultatis per Allegoriam*

EXCERPTA.

- I. Via Aquilæ in Cælo, id est, DEVS, & ANGELI.
- II. Via Colubri super Petram, id est Homo, vitiis & peccatis fædatus.  
Tandem, Gratiâ, Fide, Spe, Charitate, & Iustitiâ, exornatus.
- III. Via Navis in medio Mari, id est, Homo DEVS & Sacramenta.

*AUGUSTISSIMÆ VIRGINI*

MARIÆ,

*Quam Dominus possedit ab initio viarum suarum,  
Omnium Difficultatum Divinarum Demonstrationi,*

VOTIVO ARGUMENTO

CONSECRATA:

ET

SUB FAVENTISSIMIS AUSPICIIS;

*Multum Reverendi in Christo Patris,*

P. CONSTANTINI  
MOSZYNSKI,

SS. Theologiæ Doctoris, Conventus Rupellani ad Cracoviam

PRIORIS,

Provinciæ Polonæ DEFINITORIS MERITISSIMI.

V. P. F. CÆLESTINO OBIEGŁOWICZ,

SS. Theologiæ Auditori consummato, ad Resolvendum

PROPOSITA.

*Sub Præsidentia Reverendi in Christo Patris,*

P. DIONYSII CHEŁSTOWSKI,

Ordinis S. PAULI Primi Eremitæ, AA. LL. & Philosophiæ Doctoris,

SS. Theologiæ Actualis & Primarij Professoris.

*Anno Domini 1706. Mense Aprili. Die 12 Horis consuetis.*

CRACOVIAE,

Typis CHRISTOPHORI DOMANSKI, S. R. M. Typog.





## PRÆFATIO.

**Q**ue pridem Incarnatum didicisti VERBUM En Tibi Scholastico more Ternionem Trium difficilium supplex offero. Serenissima Virgo MARIA. Quæ licet VERBUM Divinum Tue nunquam labili mandassi memoriæ, hanc tamen ternionis pagellam, à Tuo noli eliminare Albo, nec ostendas potentiam contra folium quod vento rapitur. Non meretur quidem à Tuis revolvi manibus, sat vilem & contemptu dignam, de vitijs & peccatis continens materiem. Sed quia ex natura sua, peccatum est nihil, sistit se ante conspectum Tuum, ut in Te, nihil peccati fuisse testetur. Exambit Theologia nostra Tuum Patrocinium, pro hac igitur ambitionis nota, sub Tuum illam deponere calcaneum. Apprehende pedibus, quod mente alij concipiunt, quæ sola conceptum sine errore defendisti. Concludimus de Te ô MARIA! sed non sine Te, ex cuius præmissa gratia, felix rerum sequitur eventus & corona. Laudet Te os alienum, mihi laudis Tue thema sufficit, Hyperdulci Honori MARIANI cultorem Te dixisse, M. R. in Christo PATER. NAVICVLA Tua nunquam erit naufraga, cui corrusco jubare, Stella Maris prælucere dignatur. Ex Noemitica Navi, emissus non redijt corvus, at ex Tua Gentilitia NAVICVLA Paulinus nunquam exivit corvus, qui hucusq; de Moszynsciorum pascitur mensa. Pridem jam NAVIS hec ad Rupellane Vistulæ stitit littora, sed quia in Rupellam veluti in Scillam incidit, more naufragantium Arvia Tua S. memoriæ, in fun-

Aug. 122



in fundum quia in fundationem perpetuam Conventus Rupellani aliquot  
millia ut ita dicam proiecit, utque Posteris de hoc pijsimo Legato cogi-  
tarent semper, in Mysliczow illud collocare Nobilissime Fundatrici pla-  
cuit. Ne Paulino Corvo & in Wielgomlynensi Conventu sua deesset an-  
nona, Pater Tuus, & Pater Patrum Nostrorum, cuius summorum  
beneficiorum eterna extat memoria, illuc suam direxit Naviculam, quæ  
ibi facta est NAVIS, portans panem Fundationis. Ita exundaverat  
affectus Parentis Tui in Nostros, ut etiam post fata seipsum dederit.  
Non hic meta MOSZYNSCIANÆ Carinæ, quæ nunc primum plus  
dare Religioni Sacræ non potuit, cum Te Nobis dederit, qui omnes  
( omnium explens satiansve animos ) suaviter cogis dicere suffi-  
cit. Vixit Argo hæc in Tuo Parente Sacræ Religioni munificentias,  
at Tu Colchico maior lasone, non tam vellus aureum, quàm auream Sa-  
pientiæ messes. Cuius ut etiam ego indignus Tanti Nominis Filius  
particeps efficiar. Supplex Tuis cum Theologicis Thesibus prosternor  
plantis.

Paternitatis multum Reverendæ

Indignus Filius,

Fr. C. O. S. Th: Auditor Consumatus.

A2

PRIMUM



# PRIMUM DIFFICILE

## DEVS & ANGELI.

*Per Viam Aquilæ in Cælo allegoricè propositum.*



**A** B Iove principium esto difficultatum Nostrarum, non Cui, fabulante Antiquitate Aquila ministrabat fulmina, sed, sub cuius alis se protegendam supplicat Ecclesia, dum inquit: *Sub umbra alarum tuarum protege nos:* Aquilam ergo magnarum Alarum jure dixeris DEVM T.O.M. cujus Essentiæ viam si quæsieris difficultatem pati debebis: Quemadmodum Apostolus exclamat ad Rom: 11. *O altitudo divitiarum Sapientiæ & Scientiæ Dei, quàm incomprehensibilia sunt judicia ejus, & investigabiles viæ ejus.* De Viâ quâ processit Filius DEI à Patre, si quæsieris, Via Aquilæ est, eaque difficilis; ideò quòd nullum ad extra posuerit passum, solo manente signo Originis in Mappâ fecundi Intellectûs Divini. Ne scrutaris & Viam, quâ processit CONSOLATOR Optimus, Dulcis HOSPEX Animæ; nam & hic Aquilino in viam pacis à Patre & Filio abivit tractu, qui tantò difficilis, quantò utriq; Spiratori non similis: Egrediuntur ad executionem in tempore Decreta Divina, quorum emissiones & via exinde difficilis; quod humanum præveniant liberi arbitrij motum, nec expectant consensus humani præcursores. Hac difficultate Divinæ Viæ, Atheistæ pressi exclamare audent: Nisi videro non credam. Sed audi ò Athee! Augustinum tom: 8. in Psal: 73. *Animam tuam quis videt? Corpus tuum videtur: Cùm ergo corpus tuum solum videtur, quare non sepeliris? Sicut tu sepultum velles Deum, quem quia non vides esse negas.* Urget ulterius idem S. Doctor: *Quare non sepeliris? respondes: quia vivo. Unde scis quia vivo? respondebis, quia loquor, quia ambulo, quia operor: Stultè ex operibus corporis agnosco viventem, & ex operibus naturæ non potes cognoscere Creatorem.* Athee ut DEI demonstrationem enerves, admittis seriem causarum infinitam, aut occultos atomos, ex quorum fortuito concursu omnia coalescant; hanc autem seriem infinitam, hos atomos occultos, hunc concursum fortuitum, nec tibi visus, nec sensus, nec ratio ulla spectandum exhibuit. Item admittis res Vniuersas à solo Fato gubernari: nequè tamen te arbitror ullo hætenùs sensu Fatum magis, quàm DEVM percipisse: Quàm stulta est Atheistica propositio: NON est DEVS. Non ideò Sol non est, quod tu eum non videas: sed ideò miser es, si nolis videre, certè nolis: quia dixisti in corde, non est DEVS, ubi est voluntatis officina. Proh dolor! inquit Richardus Archdekin Soc: I. Serpit hæc



hæc dira contagio non tantum inter humiles casas ignaræ plebis, sed vix maximè homines politos, & ipsas Principum aulas pedetentim invadit: ubi à multis DEVS vix colitur, nisi purpuratus: Fortunæ tantum litare, Viros Principes, ut Semideos colere, & ab alijs coli, plurimis Summa aut Vnica Religio est. Atheismo affinis est Polytherismus, nam inquit S. Athan: orat: contra Idola: *Multitudo Numinum nullitas est Numinum.* Et Tertul. lib. 1. advers. Marcionem Cap. 3. *Deus si non unus est, non est.* Chrysostomus tractans de insipiente illo qui dixit in corde suo: NON est DEVS inquit. Primus insipiens Diabolus fuit, qui primus præco multitudinis Deorum extitit dicens: ERITIS SICUT DII: Occasio autem invehendi Polytheismi prima & potissima timor, ut dicit Petronius. *Primus in orbe Deos fecit timor.* Qui enim DEUM verum audire noluerunt jubentem, timere caperunt minantem atque ut evadere possint poenam impendentem quæsierunt sibi alium propitium Deum ad quem ab irato Deo recurrerent. Ita fecit Ovidius, qui cum Cæsareum Numen offendisset, idcirco relegatus in Pontum fuisset Deos maris & Cæli confugit, rogans, ne Cæsaris iræ subscriberent. Sed ne inusitatum implorare videretur patrocinium addidit.

Sæpè præmente Deo, fert Deus alter opem,  
 Quæ varijs exemplis illustrans adjungit:  
 Mulciber in Trojam, pro Troja stabat Apollo;  
 Æqua Venus Teucris, Pallas iniqua fuit,  
 Oderat Aneam propior Saturnia Turno,  
 Ille tamen VENERIS Numine tutus erat.  
 Sæpè ferox cautum petiit Neptunus Vlyssæ,  
 Eripuit patruo sæpè Minerva suo:  
 Et nobis aliquod, quamvis distamus ab illis,  
 Quid vetat irato, Numen adesse Deo.

Contra quos

## EX PRIMA PARTE.

CONCLUSIO I. Datur DEVS Vnus.

CONCLUSIO II. Quidditas ejus est Intelligere.

CONCLUSIO III. Cognoscit Futura absoluta in Decreto Prædeterminante.

**V** Olucres Cæli dici merentur Angeli, quos sacer textus duabus volare, & duabus velare Faciem Dei testatur alis. Horum Nativus Empyreum nidus, in quo cum pressura doloris tremendus contigit illius Angeli, qui manè oriebatur abortus tunc, quando cum ipso & cara Deo Angelorum pignora viperino morfu corrosis cæli visceribus in sinum terræ descenderunt & contempto DEI Vbere, melle & lacte fluente, inter poenam sensus, & poenam damni, veluti inter duo ubera commorari jubentur fumosum miris sed veris modis fugentes ignem. Maturum eos amisisse quis non videt statum? dum in violentis inferni cunis veluti infantes in fascijs per-



alligationem manere coguntur. Ne mirare; Cæli nidum, hunc fatum pati non potuisse, ubi ambitiosa eorum moles Cæli sedem giganteo factu gravare videbatur. Extitisse nihilominus nonnullos Philosophos, qui negabant Angelos, seu purè Spirituales Substantias in rerum natura, & hoc ideò, quia cum cognitio nostra originem ducat à sensibus, & illorum ministerio res cognoscendas sibi assimilât, & præsentis facit: Sensus autem sola percipiunt corpora: Vnde aliqui opinati sunt, nihil aliud esse in rerum natura, quàm corpora. Quapropter & Animam Rationalem, & DEVM ipsum censuerunt esse quoddam Corpus, puta Cælum, Solem, Lunam, &c. Quorum errores secuti sunt Saducæi & Manichæi. Saducæi ut habetur Actor: 23. dicebant *non esse Resurrectionem, neque Spiritum*. Manichæi autem asseriebant: DEVM esse Lucem quandam, per infinita spatia diffusam: Angelos autem & Animam Rationalem, dixerunt esse particulas Divinæ Lucis: Si quæris Saducæe Angelos, invenies in nido, quem sibi posuit CORVUS PATRIS Nostri in Solitudine, sed non soli. Sedit & in ejusmodi nido Aquila Angelus, Annuente Sede Apostolicâ, ut multiplicaret sibi Confratres Solus immultiplicabilis, foretque ARCHI-CONFRATERNITATIS ANGELICÆ, Primus in Ordine Nostro Parens.

#### EX EADEM PRIMA PARTE.

CONCLUSIO I. Dantur Angeli.

CONCLUSIO II. Ultra unum non sunt plures intra eandem Speciem.

CONCLUSIO III. Habent Vbi per operationem.

## SECUNDVM DIFFICILE HOMO,

*Per Viam Colubri Significatum.*

Serpentino semel Homo implicatus peccatorum nodo, ad tantam hebetudinem devenit ingenij, ut se explicare non possit, nisi per VERBUM. Tanta enim est Colubri calliditas, ut & facundum intellectus in homine exusserit vigorem, & fumosa Lumen rationis obfuscaverit caliginè, nocivumque evomuit frigus, ex quo & ruditas intellectus & pigrities sensuum nasci solet. Quasi à facie Colubri fugere peccatum monet Eccl. 21. Nam tantò magis nocere consuevit, quantò blandius demulcet: tantò majorem homini minatur vilitatem, quantò pretiosorem in esse homini, Libertatis deprædicat gemmam; tantò seducit animam, quantò apparentis boni fucatum ostentat colorem. Difficilis quæstio S. Hieronymo fuit proposita: Cur DEVS non fuerit dignatus hominem producere impeccabilem? Si non potuit, Omnipotens non fuit? Si non voluit, benignissimus quomodo fuit? *Artifex conatur opus suum tam perfectum facere, quàm desiderat & valet: Deus desiderat hominem esse sine peccato,*



*cato. Hæc est voluntas Dei sanctificatio nostra. 1. ad Thess. 4. Nec aliud odit, quàm peccatum. Cur ergo me non produxit tam bonum? ut nunquam malus sim? Si dicas: Deus voluit nos liberos; Respondebo, cum perfecta libertate stant ipsius Gratiæ efficaces; quas si mihi dederit, ero similis illi, quo non surrexit major. Responsum accipiamus genuinum ex S. Hieronymo lib. 2. contra Pelagium: qui inprimis monet tales quæstiones esse temerarias & obnoxias culpæ. Vide Isaiam cap. 45. intentantem talibus maledictionem: *Væ qui contradicit Factori suo! væ qui dicit Patri, ut quid me genuisti? & Matri, quare me peperisti.* Ratio & ultimum resolutorium factorum Dei, agit S. Augustinus, est Voluntas ipsius facientis: Potestne vas figuli jure quæri contra Opificem? Potestne damnatus conqueri se non habuisse sufficientia desuper auxilia? Congruentiam: Cur Deus non fecerit impeccabiles, S. Hieronymus inculcat: Cum mundus creatus sit ad manifestandas perfectiones Dei, & ideò condidit Cælum ad declarandam suam Liberalitatem in Bonos: Infernum verò ad justitiam in malos? Hominem condidit ad declarandam suam misericordiam; hæc autem non potuisset tam bene manifestari, si homo peccabilis non fuisset. Nam præcipuus misericordiæ actus est, scelera condonare; ut videre est in Exod. ubi cap. 34. Deus vocatur, *Misericors, Clemens, Patiens, multæ miserationis:* Et statim subjunctum est ibidè: *Qui auferis iniquitatem scelera atque peccatum.* Divinam misericordiam considerans D. Dionysius c. 4. de Divinis Nominibus, imaginatur Deo inesse Amorem erga peccatores ad instar motus Orbicularis, atque Circuli admirabilis, hoc modo, quod quando Amor Divinus extra se suam effundit benevolentiam in res creatas, nos suæ bonitatis illecebris suavissimè trahit ad seipsum, ut ab ipso egressi per Creationem, ad ipsum regrediamur per Beatitudinem. Et ideò Beatitudinem Mirandulanus appellat: *Reditum Creaturæ intellectualis* ad suum Principium, quem reditum impediunt per modum obicis scelera & peccata; & à consecutione finis, qui est Beatitudo per actus humanos tanquam media assequibilis abstrahunt. In hac Viâ Colubrinâ ita erravit Pelagius, ut Ariadnæ Filium non sufficeret eum quondam Ecclesiæ Filium in viam reducere rectam. Intelligere non potuit, quâ semitâ Ceraustes peccati Originâlis voluntatem nostram in Capite Adæ inclusam invasit, ideirco & omne auxilium gratiæ tam efficax, quàm sufficiens suffocavit.*

#### EX PRIMA SECUNDÆ.

CONCLUSIO I. Beatitudo Formalis est sola Visio Dei, ut est in se.

CONCLUSIO II. Peccatum formaliter est privatio: Cujus DEVS non est Causa.

CONCLUSIO III. Gratiæ efficax non est ex consensu liberi arbitrij talis, sed ex virtute suâ intrinsecâ estq; physicè prædeterminans: Distinguitur realiter à Charitate Gratiæ Habitualis.



## EX SECUNDA SECUNDÆ.

- CONCLUSIO I. Objectum terminativum Fidei est Veritas prima in Efferdo.
- CONCLUSIO II. Objectum motivum est Veritas prima in dicendo connotans Veritatem in cognoscendo.
- CONCLUSIO III. Objectum Formale Iustitiæ, est honestas æqualitatis sita in adæquatione operationis debitæ ad jus alterius.

## TERTIVM DIFFICILE

*Per Viam Navis in medio Mari representatum,*  
**HOMO DEVS, & SACRAMENTVM.**

**Q**uidam dixit: Mitto tibi nAVEm prorâ puppiq; carentem. Misit & æternus Pater ex Divina Pelago effusæ Bonitatis suæ nAVEm, prorâ puppiq; carentem; dum per Angelicum AVE oneratam rigoroſo præcepto Patris Personam V E R B I veluti Onerariam fluentem in medio Maris, quia in MARIANO Vtero posuit; ubi Vnionem inæſtimabilis pretij acquisivit. Et certè caret prorâ hæc NAVIS: dum Patrem secundum carnem nescit: caret & puppi; dum assumptâ Humanitate Personalitatem creatam in eadem Navi navigare non permisit. De hujus Naviculæ Viâ in MARIANO Mari non sis cunctabudus, monet Concilium Toletanum: *Si enim ratione ostendi posset, non esset mirabile; si exempla, non esset singulare.* Si felicem aspiras portum, hanc conscende Scapham, quæ est Vniversæ Salutis Vehiculum: V E R B V M itaque C A R O factum est. Non capit hoc mysteriû Nestorius, non capit Euthyches: Ille cum dualitate Personarum; Iste cum confusione Naturarum: Vnde duplex in CHRIſTO Persona, & simplex Natura, duplex est error, cui oppositum tenet Fides Catholica: Duplicem videlicet Naturam & Vnam Personam. Exinde tamen non duo, sed *Unus est Christus, quia hæc Persona non confundit Substantias: nec Substantiæ dissipant Personæ Unitatem.* Inquit S. Bernardus Serm: de Vigilia Nativitatis.

## EX TERTIA PARTE.

- CONCLUSIO I. V E R B V M Caro factum Esse non est demonstrabile naturali ratione.
- CONCLUSIO II. Pura Creatura non potuit satisfacere de condigno pro peccato, quàmvis illud non sit simpliciter infinitum.
- CONCLUSIO III. Si Adam non peccasset, Christus non venisset.

**I**nſenſissima A catholicorum Hydra septenario Sacramentorum se opponit Herculi, in Navi nostra se salvandos sperant & secundam post naufragium tabulam non tenent, & hoc quod per subtractionem malitio-

ſam



ſanſacrum numerum ad duo Sacramenta reducant per multiplicationem ſub utraq; ſpecie recompenſare videntur. O quantus ſcrupulus! O quàm ſacrilegus reſtitutionis modus! O quanta hoſpitalitatis officioſitas! ponere menſam ſub utraq; Specie; cui Solum & Vnicum ſufficit Manna; quod quia eſt abſconditum; ideò apud Sectarios eſt difficile captu, quomodo Manna ſumi poteſt ſine calice? qui ut vincant uſum utriuſq; Speciei Eucharistiæ, adducunt Leonem & Gelafium Papam, à quibus damnatos ajunt Manichæos, eò, quòd ſub una Specie communicarent: ideòq; ab his Pontificibus utrâq; Speciem Fidelibus præceptam eſſe inquiunt, ut habetur apud Gratianũ in ca. COMPERIMUS. Sed falſum eſt Manichæos ſimpliciter propter unius Speciei ſumptionem damnatos eſſe, quod nullibi legimus, res autem ſic ſe habet: Manichæi, qñ Vinum, Sanguinem Draconis appellabant, nullo modo credebant ſub Vini Specie Chriſti Sanguinem poſſe contineri. Hinc docebant, non niſi ſub una Specie cõmunicari poſſe: Cũ autem iſti ex Affrica Romam venientes, Sectam ſuam diſſimulare vellent, Catholicis ſe adjugebant, & cũ illis ſub una tantũ Specie cõmunicabant, ut ita cõmodius laterent. Quam fraudem ut notarunt Pontifices LEO prius, & poſtea GELASIUS, exinde præceperunt, ut omnes Catholici ſub utraq; ſpecie Eucharistiã ſumerent: quod & factum eſt & hoc pacto, Manichæi à Catholicis diſcreti ſunt. Ratio ergo hujus Eccleſiaſtici præcepti non eſt neceſſitas utriuſq; Speciei, ſed tantũ ut Hæreticorum error & fraus detegeretur.

### EX TERTIA PARTE.

- CONCLU: I. Sacramenta Novæ Legis cauſant gratiam phyſicè.  
CONCLU: II. Communio Paſchalis ſub utraq; Specie non eſt neceſſaria.  
CONCLU: III. Implicat Sacramentum Pænitentiaæ validum & informe.

### QVARTVM PENITVS IGNORO,

Niſi Te DEVM Ter Optimum Maximum,

Qui

Si viſ Viâ Aquilæ nos Salvos fieri,

*Eleva.*

Si Viam Colubri Vitare,

*Præcave:*

Si Viâ Navis Portum Felicitatis intrare.

*Impera Ventis.*

*Ad M. D. G. B. M. V. I. C. Honorem.*







Biblioteka Jagiellońska



stdr0025414



